

四庫全書

集部

欽定四庫全書

御定全唐詩卷六百五

邵謁

邵謁韶州翁源縣人少爲縣吏令怒逐去遂截髻著縣門發憤讀書工古調釋褐赴官不知所終詩一卷

放歌行

龜為秉靈亡魚為弄珠死心中自有賊莫怨任公子屈原若不賢焉得沈湘水

長安寒食

春日照九衢春風媚羅綺萬騎出都門擁在香塵裏莫
辭弔枯骨千載長如此安知今日身不是昔時鬼但看
平地遊亦見摧輶死

貞女墓

生持節操心死作堅貞鬼至今墳上春草木無花卉

自歎

春蠶未成罍已賀箱籠實蟄子徒有絲終年不成足每

念古人言有得則有失我命獨如何憔悴長如一白日
九衢中幽獨暗如漆流泉有枯時窮賤無盡日惆悵復
惆悵幾迴新月出

送徐羣宰望江

古人力文學所務安疲忙今人力文學所務惟公卿大
賢重邦本屈跡官武城勸民勤機杼自然國用并但見
富貴者知食不知耕忽爾秋不熟儲一作庾廩焉得盈貢
藝既精苦用心必公平吾道不遺賢霄漢期芳馨一夫

若有德千古稱其英陶潛雖理邑崔烈徒台衡濁者必
惡清瞽者必惡明孤松自有色豈奪衆草榮為刀若不
利焉得宰牛名為絲若不直焉得琴上聲好去立高節
重來振羽翎

秋夕

萬里憑夢歸骨肉皆在眼覺來益惆悵不信長安遠人
人皆為農我獨常逢旱惡命如漏卮滴滴添不滿天末
雁來時一叫一腸斷

覽孟東野集

蚌死留夜光劍折留鋒鋸哲人歸大夜千古傳珪璋
璋徧四海人倫多變改題花花已無翫月月猶在不知
天地間白日幾時昧

送友人江行

送君若浪水疊疊愁一作悲思起夢魂如月明相送秋江
裏

下第有感

古人有遺言天地如掌濶我行三十載青雲路未

一作難

達嘗聞讀書者所貴免征伐誰知失意時痛於刃

一作楚欲

傷骨身如石上草根蒂淺難活人人皆愛春我獨愁花
發如何歸故山相攜採薇蕨

論政

賢哉三握髮為有天下憂孫弘不開閣丙吉寧問牛內
政由股肱外政由諸侯股肱政若行諸侯政自修一物
不得所蟻穴滿山丘莫言萬木死不因一葉秋朱雲若

不直漢帝終自由子嬰一失國渭水東悠悠

戰城南

武皇重征伐戰士輕生死朝爭刃上功暮作泉下鬼悲
風弔枯骨明月照荒壘千載留長聲嗚咽城南水

贈鄭殷處士

善琴不得聽嘉玉不得名知音既已死良匠亦未生退
居一河湄山中物景清魚沈池水碧鶴去松枝輕長材
靡入用大厦失巨楹顏子不得祿誰謂天道平

古樂府

對酒彈古琴弦中發新音新音不可辨十指幽怨深妾
顏不自保四時如車輪不知今夜月曾照幾時人露滴
芙蓉香香銷心亦死良時無可留殘紅謝池水

經安容先生舊居

羽化留遺蹤千載蹤難沒一泉巖下水幾度換明月松
老不改柯龍久皆變骨雲雨有歸時雞犬無還日至今
青山中寂寞桃花發

望行人

登樓恐不高及高君已遠雲行郎即行雲歸郎不返嗟
為樓上人望望不相近若作轍中泥不放郎車轉白日
下西山望盡妾腸斷

歲豐

皇天降豐年本憂貧士食貧士無良疇安能得稼穡工
傭輸富家日落長歎息為供豪者糧役盡匹夫力天地
莫施恩施恩施强者得

金谷園懷古

在富莫驕奢驕奢多自亡為女莫騁容騁容多自傷如
何金谷園鬱鬱椒蘭房昨夜綺羅列今日池館荒竹死
不變一作改節花落有餘香美人抱義死千載名猶彰嬌
歌無遺音明月留清光浮雲易改色衰草難重芳不學

韓侯婦銜冤報宋王

春日有感

我心如藥苦他見如薺甘火未到身者痛楚難共諳但

言貧者拙不言富者貪誰知苦寒女力盡為桑蠶

學仙詞

第三句
缺三字

上仙傳祕訣澹薄與無營鍊藥

變姓不變形三

尸既無累百慮自不生是知寸心中有路通上清祖龍
好仙術燒却黃金精

妓女

天若許人登青山高不止地若許人窮黃泉深無水量
諸造化情物成皆有以如何上青冥視之平若砥日下

騁琅玕空中無羅綺但見勢騰凌將為長如此炫燿一
時間逡巡九泉裏一種為埃塵不學墮樓死

寒女行

寒女命自薄生來多賤微家貧人不聘一身無所歸養
蠶多苦心蠶熟他人絲織素徒苦力素成他人衣青樓
富家女纔生便有主終日著羅綺何曾識機杼清夜聞
歌聲聽之淚如雨他人如何歡我意又何苦所以問皇
天皇天竟無語

覽鏡

一照一迴悲再照顏色衰
日月自流水不知身老時
昨日照紅顏今朝照白絲
白絲與紅顏相去咫尺間

輕薄行

薄薄身上衣輕輕浮雲質
長安一花開九陌馬蹄疾
誰言公子車不是天上力

苦別離

十五為君婚二十八君門
自從入戶後見君長出門
朝

看相送人暮看相送人若遣折楊柳此地樹無根願為
陌上土得作馬蹄塵願為曲木枝得作雙車輪安得太
行山移來君馬前

覽張騫傳

採藥不得根尋河不得源此時虛白首徒感武皇恩桑
田未聞改日月曾幾昏仙骨若求得壘頭無新墳不見
杜陵草至今空自繁

白頭吟

漢家天宇濶日月不暫閒
常將古今骨裨作北邙山
山高勢已極猶自凋朱顏

瞽者歎

我心豈不平我目自不明
徒云備雙足天下何由行

送從弟長安下第南歸覲親

白日不得照戴天如戴盆
青雲未見路丹車勞出門
採薇秦山鎮養親湘水源
心中豈不切其如行路難
為文清益峻為心直且安
芝蘭未入用馨香志獨存
他門種

桃李猶能蔭子孫我家有棠陰枝葉竟不繁心醉豈因
酒愁多徒見萱征徒忽告歸執袂殷勤論在鳥終為鳳
為魚湏化鯢富貴豈長守貧賤寧有根丈夫志不大何
以佐乾坤晝短疾於箭早來獻天言莫戀蒼梧畔野煙
橫破村

少年行

丈夫十八九膽氣欺韓彭報讎不用劍輔國不用兵以
目為水鑑以心作權衡願君似堯舜能使天下平何必

走馬誇弓矢然後致得人心爭

漢宮井

轆轤聲絕離宮靜班姬幾度照金井梧桐老去殘花開

猶似當時

一作年

美人影

顯

一作題

茂樓

秦山渭水尚悠悠如何草樹迷宮闕繁華朱翠盡東流
唯有望樓對明月

紫閣峯

壯國山河倚空碧迴拔煙霞侵太白綠崖下視千萬尋
青天只據百餘尺

御定全唐詩卷六百五

欽定四庫全書

御定全唐詩卷六百六

林寬

林寬侯官人詩一卷

送李員外頻之建州

句踐江頭月客星臺畔松為郎久不見出守暫相逢
鳥泊牽灘索花空押號鐘遠人思化切休上武夷峰

送許崇先輩歸宣州

髮枯窮律韻字字合墳麓日月所到處姓名無不知鶯
啼謝守壘苔老謫仙碑詩道喪來久東歸為弔之

窮冬太學

投跡依槐館荒亭草合時雪深鶯嘯急薪濕鼎吟遲默
坐同誰話非僧不我知匡廬瀑布畔何日副心期

陪鄭誠郎中假日省中寓直

憲廳名最重假日許從容牀滿諸司印庭高五粒松井
尋芸吏汲茶拆岳僧封鳥度簾旌暮猶吟隔苑鐘

送謝石先輩歸宣州

名隨春色遠湖外已先知
花盡方辭醉鶯殘是放時
天寒千尺嶽頷白半聯詩
笋蕨猶堪採榮歸及養期

下第寄歐陽瓚

詩人道僻命多奇更值干

一作兵

戈亂起時莫作江寧王

少府一生吟苦竟誰知

寄何紹餘

雁過君猶未入城清賢門下舊知名
風波凍馬遙逢見

草索飢僮尚挈行住在閑坊無轍跡別來何寺有泉聲
芙蓉苑北曲江岸期看終南新雪晴

送人宰浦城

東南猶阻寇梨嶺更誰登作宰應無俸歸船必有僧灘
平眠獺石燒斷飲猿藤歲盡校殊最方當見異能

省試臘後望春宮

皇都初度臘鳳輦出深宮高凭樓臺上遙瞻灞滻中仗
凝霜彩白袍映日華紅柳眼方開凍鶯聲漸轉風御溝

穿斷靄驪岫照斜空時見宸游興因觀稼穡功

寄省中知已

門掩清曹晚靜將烏府鄰花開封印早雪下典衣頻怪
木風吹閣廢巢時落薪每憐吾道苦長說向同人

朱坡

朱坡坡上望不似在秦京漸覺溪山秀更高魚鳥情夜
吟禪子室曉爨獵人鎬恃此偷佳賞九衢蜩未鳴

酬陳樵見寄

失意閒眠起更遲
又將羈薄謝深知
囊書旋入酒家盡
紗帽長依僧壁垂
待月句新遭鬼哭
尋山貌古被猿窺
元和才子多如此
除却清吟何所為

華清宮

殿角鐘殘立宿鴉
朝元歸駕望無涯
香泉空浸宮前草
未到春時爭發花

終南山

標奇聳峻壯長安
影入千門萬戶寒
徒自倚天生氣色

塵中誰為舉頭看

歌風臺

蒿棘空存百尺基
酒酣曾唱大風詞

一作時

莫言馬上得

天下

一作子

自古英雄盡解詩

送人歸日東

滄溟西畔望一望
一心摧地即同正
朔天教阻往來波
翻夜作電鯨吼晝為雷
門外人後徑到時
花幾開

寓興

西母一杯酒空言浩劫春英雄歸厚土日月照閒人衰
草珠璣塚冷灰龍鳳身茂陵驪岫晚過者暗傷神

少年行

柳煙侵御道門映夾城開白日莫空過青春不再來報
讐衝雪去乘醉臂鷹迴看取歌鐘地殘陽滿壞臺

塞上還答友人

無端遊絕塞歸鬢已蒼然戎羯圍中過風沙馬上眠草
衰頻過一作燒耳冷不聞蟬從此甘貧坐休言更到邊

哭棲白供奉

侍輦才難得三朝有上人
琢詩方到骨至死不離貧
風帳孤螢入霜堦積葉頻
夕陽門半掩過此亦無因

送昇道靖恭相公分司

東風時不遇果見致君難
海一作華

一作岳

影猶動鷗鵬勢未

安星沈闕鎖冷雞唱驛燈殘

誰一作問

二賓客門間蒿

洛寒

關下早行

軋軋推危轍聽雞獨早行風吹宿靄散月照華山明白
首東西客黃河晝夜清相逢皆有事唯我是閒情

曲江

曲江初碧草初青萬轂千蹄匝岸行傾國妖姬雲鬢重
薄徒公子雪衫輕瓊鑄狒狒遶觥舞金蹙辟邪擎撥鳴
柳絮杏花留不得隨風處處逐歌聲

長安遣懷

醉下高樓醒復登任從浮薄笑才能青龍寺裏三門上

立為南山不為僧

送僧遊太白峰

雲深遊太白莫惜遍探奇頂上多靈跡塵中少客知懸崖倚凍瀑飛猱過孤枝出定更何事相逢必有詩

哭造微禪師

神僊不火葬新塔露疎桎是物皆磨滅唯師出死生虛

堂

一作壑

散釣叟怪木

一作土

哭山精林下路長在無因更

此行

獻同年孔郎中

炊瓊熟桂帝關居賣盡寒衣典盡書驅馬每尋霜影裏
到門常在鼓聲初蟾枝交彩清蘭署鸞珮排光映玉除
一顧深恩身未殺爭期皎日負吹嘘

聞雁

接影橫空背雪飛聲聲寒出玉關遲上陽宮裏三千夢
月冷風清聞過時

送惠補闕

詔下搜巖野高人入竹

一作舊

林長因抗疏日便作去官

心清俸供僧盡滄洲寄跡深東門有歸路徒自棄華簪

和友人賊後

帶號乞兵急英雄陷賊圍江山猶未靜魚鳥欲何歸城
露桑榆盡時平老幼稀書從戰後得讀徹血盈衣

長安即事

暝鼓纔終復曉雞九門何計出沈迷樵童亂打金吾鼓
豪馬爭奔丞相隄翡翠鬟歌釵上燕麒麟衫東海中犀

須知不是詩人事空憶泉聲菊畔畦

和周繇校書先輩省中寓直

古木重門掩幽深祇欠溪此中真吏隱何必更巖棲名
姓鐫幢記經書逐庫題字隨飛蠹缺堦與落星齊伴直
僧談靜侵霜蛩韻低粘塵賀草沒剝粉薛禽迷

賀知章
草書薛

稷鶴也

衰蘚墻千堵微陽菊半畦鼓殘鴉去北漏在月沈

西每憶終南雪幾登雲閣梯時因搜句次那惜一招攜

苦雨

霑霖翳日月窮巷變溝坑驟濕纖枝折奔傾壞堵平蒙
蒼來客絕躍甃噪蛙穉敗屐陰苔積摧簷濕菌生斜飛
穿裂瓦迸落打空鐺葉底遲歸蝶林中滯出鶯潤侵書
縫黑冷浸鬢絲明牖暗參差影堦寒斷續聲尺薪功比
桂寸粒價高瓊遙想管弦裏無因識此情

御定全唐詩卷六百六

欽定四庫全書

御定全唐詩卷六百七

劉鄴

劉鄴字漢藩三復之子咸通中從藩幕召入內庭特賜
及第歷相位僖宗朝再遷尚書左僕射死黃巢之難甘
棠集三卷今存詩二首

翰林作

曾是江波垂釣人自憐深厭九衢塵浮生漸老年隨水

往事曾聞淚滿巾已覺遠天秋色動不堪聞夜雨聲頻
多慚不是相如筆虛直金鑾接待臣

待漏院吟

玉堂簾外獨遲遲明月初沈勘契時聞聽景陽鐘盡後
兩鶯飛上萬年枝

李鵬

李鵬官至江南西道都團練觀察處置等使詩五首

慧山寺肄業送懷坦上人

流水何山分浮雲空中遇我生無根株聚散亦難固憶
昨鬪龍春巖棲侶高步清懷去羈束幽境無滓汚日落
九峯明煙生萬華暮茲歡未云隔前笑倏已故四時難
信留百草換霜露離襟一成解悵抱將何諭驚泉有餘
哀永日誰與度緬思孤帆影再往重江路去去忽悽悲
因風暫回顧

讀惠山若冰師集因題故院三首

五天何處望心念起皆知化塔留今日泉鳴自昔時古

苔生石靜秋草滿山悲莫道聲容遠長歌白雪詞

高懷逢異境佳句想吟頻月冷松溪夜煙濃草寺春浮
雲將世遠清聽與名新不見開巖日空為拜影人

景物搜求歇山雲放縱飛樹寒煙鶴去池靜水龍歸暗
榻塵飄滿陰簷月到稀何年燈焰盡風動影堂扉

自惠山至吳下寄酬南徐從事

不接芳晨游獨此長洲苑風顏一成阻翰墨勞空返悠
悠汀渚長杳杳蘋花晚如何西府歡尚念東吳遠瑤音

動清韻蘭思芬盈畹猶及九峰春歸吟白雲燮

孫蜀

孫蜀與方干同時詩一首

中秋夜戲酬顧道流

不那此身偏愛月等閒看月即更深仙翁每被嫦娥使
一度逢圓一度吟

歐陽澥

歐陽澥四門博士詹之孫詩一首

詠燕上主司鄭愚

翩翩雙燕畫堂開
送古迎今幾萬回
向春秋社前後
為誰歸去為誰來

句

黃菊離家十四

一作四十年

離家已是夢松年

落日望

鄉處何人知客情

見紀事

陳黯

陳黯字希孺泉州人會昌迄咸通累舉不第集五卷今

存詩一首

自詠豆花

玳瑁應難比斑犀定不加天嫌未端正滿面與妝花

張孜

張孜京兆人耽酒如狂與李山甫善詩一首

雪詩

長安大雪天烏雀難相覓其中豪貴家搗椒泥四壁到處熱紅爐周迴下羅幕暖手調金絲蘸甲斟瓊液醉唱

玉塵飛因融香汗滴
豈知飢寒人手脚生皴劈

句

著牙賣朱紫
斷錢賒舉選

見紀事

華山秀作英雄骨黃

河瀉出縱橫才

夢破青霄春煙霞無去塵
若誇郭璞

五色筆江淹却是尋常人

夢李白歌

鄭仁表

鄭仁表字休範
滎陽人累擢起居郎
劉鄴作相時貶死

嶺外詩二首

贈妓僂哥

北里志天水仙哥住平康南曲善談謔能歌仁表席上贈詩

嚴吹如何下太清玉肌無疹六銖輕自知不是流霞酌
願聽雲和瑟一聲

贈妓命洛真

北里志洛真有風貌且辨慧時為席糾善草程

巧製新章拍拍新金壘巡舉助精神時時欲得橫波睇
又怕回籌錯指人

句

文章世上爭開路閥閱山東拄破天

趙鴻

趙鴻咸通中人詩三首

杜甫同谷茅茨

工部棲遲後鄰家大半無青羌迷道路白社寄杯盃大
雅何人繼全生此地孤孤雲飛鳥什空勒舊山隅

栗亭

趙鴻刻石同谷曰工部
題栗亭十韻不復見

杜甫栗亭詩詩人多在口悠悠二甲子題紀今何有

泥功山

立石泥功狀天然詭怪形未嘗私禍福終不費丹青

童翰卿

童翰卿大中咸通間人詩二首


昆明池織女石

一作司馬復詩

一片昆明石千秋織女名
見人虛脈脈臨水更盈盈
苔作輕衣色波為促杼聲
岸雲連鬢濕沙月對眉生
有臉蓮同笑無心鳥不驚
還如朝鏡裏形影兩分明

絕句

大朴逐物盡哀我天地功爭得榮辱心灑然歸西風



御定全唐詩卷六百七

欽定四庫全書

集部

御定全唐詩卷六百八十五

詳校官庶吉士臣胡鈺

主事銜臣徐以坤覆勘

總校官知縣臣繆琪

校對官助教臣汪日贊

謄錄監生臣張鴻仁

欽定四庫全書

御定全唐詩卷六百八

皮日休

皮日休字襲美一字逸少襄陽人性傲誕隱居鹿門自號間氣布衣咸通八年登進士第崔璞守蘇辟軍事判官入朝授太常博士黃巢陷長安偽署學士使為識文疑其譏已遂及禍集二十八卷今編詩九卷

補周禮九夏系文

并序

周禮鍾師掌金奏凡樂事以鐘鼓奏九夏案鄭康成注云夏者大也樂之大者歌有九也九夏者皆詩篇名也頌之類也

一作九夏者皆詩篇銘頌之類也

此歌之大

者載在樂章樂崩亦從而亡是以頌不能具也嗚呼吾觀之魯頌其古也亦久矣九夏亡者吾能頌乎夫大樂既去至音不嗣頌於古不足以補亡頌於今不足以入用庸可

一作何

頌乎頌之亡者俾千古之下鄭衛之內窈窕

一作杳杳

冥冥不獨有大卷

音卷

黃帝
樂名之音者乎

九夏歌九篇

王夏之歌者王出入之所奏也

四章章四句

燾燾皎日歟麗于天厥明御舒如王出焉

燾燾皎日歟入于地厥晦厥貞如王入焉

出有龍旂入有珩珮勿驅勿馳惟慎惟戒

出有嘉謀入有內則繄彼臣庶欽王之式

肆夏之歌者尸出入之所奏也

二章章四句

惜惜清廟儀儀象服我尸出矣迎神之穀
杳杳陰竹坎坎路鼓我尸入矣得神之祐

昭夏之歌者牲出入之所奏也

二章章四句

有鬱其鬯有儼其彝九變未作全乘來之

既醑既酢爰饋

音孕一作暢

爰舞象物既降全乘之去

納夏之歌者四方賓客來之所奏也

四章章四句

麟之儀儀不繫不維樂德而至如賓之嬉

鳳之愉愉不箐不效樂德而至如賓之娛

自筐及筥我有牢醕自筐及篚我有貨幣

我牢不愆我貨不匱碩碩其才有樂而止

章夏之歌者臣有功之所奏也

四章章四句

王有虎臣錫之鈇鉞征彼不悛一撲而滅

王有虎臣錫之圭瓚征彼不享一烘而泮

王有掌訝追

音傾

爾疆理王有掌客饋爾饗餼

何以樂之金石九奏何以錫之龍旂九旒

齊夏之歌者夫人祭之所奏也

一章四句

璽璽衡筭輦衣

一作輦

愉翟自內而祭為君之則

族夏之歌者族人酌之所奏也

二章章四句

洪源誰孕疏為江河大塊孰埏播為山阿

厥流浩漾

一作漾

厥勢嵯峨今君之酌慰我實多

械

與陔同一作械

夏之歌者賓既出之所奏也

三章章三句

禮酒既酌嘉賓既厚牘為之奏

禮酒既竭嘉賓既悅應為之節

禮酒既罄嘉賓既醒

一作醒

雅為之行

牘應雅三樂器也賓醉而出奏械夏

以此三器築地
為之行事也

鵲夏之歌者公出入之所奏也

二章章四句

桓桓其珪衮衮其衣出作二伯天子是毗
桓桓其珪衮衮其服入作三孤國人是福

三羞詩三首

并序

丙戌歲日休射策不上東退於肥陵出都門見朝
列中論犯當權者得罪南竄邠詔辰發持法吏不
容一息留私室視其色若將厭祿位悔名望者皮

子闕之惘然泣血然羞故作是詩以贖之

吾聞古君子介介勵其節入門疑儲宮撫已思鉞鉞志

一作忠

者若不退佞者何由達君臣一轂膳家國共殘殺

此道見於今永思心若裂王臣方蹇蹇佐我無玷缺如
何以謀計中道生芽蘖憲司遵故典分道播南越蒼惶
出班行家室不容別玄鬢行為霜清淚立成血乘遽劇
飛鳥就傳過風發嗟吾何為者叨在造士列獻文不上
第歸于淮之汭蹇蹄可再犇退羽可後歇利則侶軒裳

塞則友松月而於方寸內未有是愁結未為祿食仕俯
不媿梁糲未為冠冕人死不慙忠烈如何有是心不能
叩丹闕赫赫負君歸南山采芝蕨

日休旅次於許傳舍聞叫吽之聲動於城郭問於
道民民曰蠻圍我交趾奉詔徵許兵二千征之其
征且再有戰皆沒其哭者許兵之屬嗚呼揚子不
云夫朱崖之絕捐之力也否則介鱗易我衣裳
其是之謂耶皮子為之內過曰吾之道不足以濟

時不可以備位又手不提桴鼓身不被兵械恬然
自順恬然自樂吾亦為許師之罪人耳作詩以弔
之

南荒不擇吏致我交趾覆繇聯三四年流為中夏辱懦
者鬪即退武者兵則黷軍庸滿天下戰將多金玉刮則
齊民癰分為猛士祿雄健許昌師忠武冠其族去為萬
騎風住作一川肉昨朝殘卒回千門萬戶哭哀聲動閭
里怨氣成山谷誰能聽晝輦不忍看金鏃吾有制勝術

不奈賤碌碌貯之胃臆間
慙見許師屬自嗟胡為者得
躡前修躅家不出軍租身不識部曲
亦衣許師衣亦食許師粟
方知古人道蔭我已為足念此向誰羞
悠悠潁川綠

丙戌歲淮右蝗旱日休寓小墅於州東下第後歸
之見潁民轉徙者盈途塞陌至有父捨其子夫捐
其妻行哭立句朝去夕死嗚呼天地誠不仁耶皮
子之山居樅有襲鎔有炊晏眠而夕飽朝樂而暮

娛何能於賴川民而獨享是為將天地遺之耶因
羞不自容作詩以唁之

天子丙戌年淮右民多飢就中賴之汭轉徙何纍纍夫
婦相顧亡棄却抱中兒兄弟各自散出門如大癡一金
易蘆蔔一縑換鳧茈荒村暮烏樹空屋野花籬兒童鬻
草根倚桑空羸羸斑白死路傍枕土皆離離方知聖人
教於民良在斯厲能去人愛荒能奪人慈如何司牧者
有術皆在茲粵吾何為人數畝清溪湄一寫落第文一

家歡復嬉朝食有麥饘晨起有布衣一身既飽暖一家
無怨咨家雖有畎畝手不秉鎡基歲雖有札瘥庖不廢
晨炊何道以致是我有明公知食之以俟食衣之以俟
衣歸時卹金帛使我奉庭闈撫已媿賴民奚不進德為
因茲感知已盡日空涕洟

七愛詩

并序

皮子之志常以真純自許每謂立大化者必有真
相以房杜為真相焉定大亂者必有真將以李太

尉為真將焉。傲大君者必有真隱。以盧徵君為真
隱焉。鎮澆俗者必有真吏。以元魯山為真吏焉。負
逸氣者必有真放。以李翰林為真放焉。為名臣者
必有真才。以白太傅為真才焉。嗚呼。吾之道時耶
行其事也。在乎愛忠矣。不時耶行其事也。亦在乎
愛忠矣。苟有心歌詠者。豈徒然哉。

房杜二相國

玄齡
如晦

吾愛房與杜。貧賤共聯步。脫身拋亂世。策杖歸真主。縱

橫握中筭左右天下務翫饌無敵才磊落不世遇美矣
名公卿魁然真宰輔黃閣三十年清風一萬古巨業照
國史大勲鎮王府遂使後世民至今受陶鑄粵吾少有
志敢躡前賢路苟得同其時願為執鞭豎

李大尉

晟

吾愛李太尉崛起定中原驍雄十萬兵四面圍國門一
戰取王畿一叱散妖氛乘輿既反正兇豎爭亡魂巍巍
柱天功蕩蕩蓋世勲仁於曹孟德勇過霍將軍丹卷入

帝藏青史傳子孫所謂大丈夫動合驚乾坤所謂聖天子難得忠貞臣下以契魚水上以合風雲百世必一亂千年方一人吾雖翰墨子氣槩敢不羣願以太平頌題向甘泉春

盧徵君

鴻

吾愛盧徵君高卧嵩山裏百辟未一顧三徵方暫起坦腹對宰相岸幘揖天子建禮門前吟金鑾殿裏醉天下皆鋪糟徵君獨潔已天下皆樂聞徵君獨洗耳天下皆

懷羞徵君獨多耻銀黃不妨懸赤紱不妨被而於心抱
中獨作羲皇地藍輦一云返泥詔褒不已再看緱山雲
重酌嵩陽水放曠書裏終逍遙醉中死吾謂伊與周不
若徵君貴吾謂巢與許不若徵君義高名無階級逸迹
絕涯涘萬世唐書中逸名不可比粵吾慕真隱強以骨
肉累如教不為名敢有徵君志

元魯山

德秀

吾愛元紫芝清介如伯夷輦母遠之官宰邑無玷疵三

年魯山民豐稔不暫饑三年魯山吏清慎各自持只飲
魯山泉只采魯山薇一室冰檠苦四遠聲光飛退歸舊
隱來斗酒入茅茨雞黍匪家畜琴尊常自怡盡日一菜
食窮年一布衣清似匣中鏡直如琴上絲世無用賢人
青山生白髭既卧黔婁衾空立陳寔碑吾無魯山道空
有魯山辭所恨不相識援毫空涕垂

李翰林

白

吾愛李太白身是酒星魄口吐天上文迹作人間客礫

矧千丈林澄澈萬尋碧醉中草樂府十幅筆一息名見
承明廬天子親賜食醉曾吐御床傲幾觸天澤權臣妬
逸才心如斗筭窄失恩出內署海岳甘自適刺謁戴接
羅赴宴著穀一作穀履諸侯百步迎明君九天憶竟遭腐
脅疾醉魄歸八極大鵬不可籠大椿不可植蓬壺不可
見姑射不可識五岳為辭鋒四溟作胃臆惜哉千萬年
此俊不可得

白太傅

居易

吾愛白樂天逸才生自然誰謂辭翰器乃是經綸賢歟
從浮豔詩作得典誥篇立身百行足為文六藝全清望
逸內署直聲驚諫垣所刺必有思所臨必可傳忘形任
詩酒寄傲徧林泉所望標文柄所希持化權何期遇
毀中道多左遷天下皆汲汲樂天獨怡然天下皆悶悶
樂天獨舍旃高吟辭兩掖清嘯罷三川處世似孤鶴遺
榮同脫蟬仕若不得志可為龜鏡焉

正樂府十篇

并序

樂府蓋古聖王采天下之詩欲以知國之利病民
之休戚者也得之者命司樂氏入之於埴篲和之
以管籥詩之美也聞之足以勸乎功詩之刺也聞
之足以戒乎政故周禮太師之職掌教六師小師
之職掌諷誦詩由是觀之樂府之道大矣今之所
謂樂府者唯以魏晉之侈麗陳梁之浮豔謂之樂
府詩真不然矣故嘗有可悲可懼者時宣於詠歌
總十篇故命曰正樂府詩

卒妻怨

河湟戍卒去一半多不迴家有半菽食身為一囊灰官
吏按其籍伍中斥其妻處處魯人鬻家家把婦哀少者
任所歸老者無所攜況當札瘥年米粒如瓊瑰纍纍作
餓殍見之心若摧其夫死鋒刃其室委塵埃其命即用
矣其賞安在哉豈無黔敖恩救此窮餓骸誰知白屋士
念此翻欸歎

橡媪歎

秋深橡子熟散落榛蕪岡偃偃黃髮媼拾之踐晨霜移
時始盈掬盡日方滿筐幾曝復幾蒸用作三冬糧山前
有熟稻紫穗襲人香細穫又精舂粒粒如玉璫持之納
於官私室無倉箱如何一石餘只作五斗量狡吏不畏
刑貪官不避賊農時作私債農畢歸官倉自冬及於春
橡實誑飢腸吾聞田成子詐仁猶自王吁嗟逢橡媼不
覺淚霑裳

貪官怨

國家省闡吏賞之皆與位素來不知書豈能精吏理大者或宰邑小者皆尉史愚者若混沌毒者如雄虺傷哉堯舜民肉袒受鞭箠吾聞古聖王天下無遺士朝廷及下邑治者皆仁義國家選賢良定志兼拘忌所以用此徒令之充祿仕何不廣取人何不廣歷試下位既賢哉上位何如矣胥徒賞以財俊造悉為吏天下若不平吾當甘棄市

農父謠

農父冤辛苦向我述其情難將一人農可備十人征如
何江淮粟輓漕輸咸京黃河水如電一半沈與傾均輸
利其事職司安敢評三川豈不農三輔豈不耕奚不車
其粟用以供天兵美哉農父言何計達王程

路臣恨

路臣何方來去馬真如龍行驕不動塵滿轡金瓏璵有
人自天來將避荆棘叢惺呼不覺止推一作推下蒼黃中

十夫掣鞭策御之如驚鴻日行六七郵督若鷹無蹤路

臣慎勿愬愬則刑爾躬軍期方似雨天命正如風七雄
戰爭時賓旅猶自通如何太平世動步却途窮

賤貢士

南越貢珠璣西蜀進羅綺到京未晨旦一一見天子如
何賢與俊為貢賤如此所知不可求敢望前席事吾聞
古聖人射宮親選士不肖盡屏跡賢能皆得位所以謂
得人所以稱多士歎息幾編書時哉又何異

頌夷臣

夷師本學外仍善唐文字吾人本尚捨何況夷臣事所以不學者反為夷臣戲所以尸祿人反為夷臣忌吁嗟華風衰何嘗不由是

惜義鳥

商顏多義鳥義鳥實可嗟危巢末

一作年

累累隱在栲木

花他巢若有雛乳之如一家他巢若遭捕投之同一羅商人每秋貢所貴復如何飽以稻粱滋飾以組繡華惜哉仁義禽委戲於宮娥吾聞鳳之貴仁義亦足夸所以

不遭捕蓋緣生不多

誚虛器

襄陽作髹器中有庫露真持以遺北虜紹云生有神每
歲走其使所費如雲屯吾聞古聖王修德來遠人未聞
作巧詐用欺禽獸君吾道尚如此戎心安足云如何漢
宣帝却得呼韓臣

哀隴民

隴上千萬仞鸚鵡巢其巔窮危又極嶮其山猶

一作獨

不

全蚩蚩隴之民懸度如登天空中覘其巢隨者爭紛然
百禽不得一十人九死焉隴川有戍卒戍卒亦不聞將
命提雕籠直到金臺一作堂前彼毛不自珍彼舌不自言
胡為輕人命奉此玩好端吾聞古聖王珍禽皆舍旃今
此隴民屬每歲啼漣漣

奉獻致政襄祕監

何屑本徵士高情動天地既無閤閱門常嫌冠冕累宰
邑著嘉政為郡留高致移官在書府方樂駕池貴玉季

牧江西泣之不忍離捨杖隨之去天下欽高義烏帽白
絺裘籃輿竹如意黃菊陶潛酒青山謝公妓月檻詠詩
情花溪釣魚戲鍾陵既方舟魏闕將結駟甘求白首閒
不為蒼生起優詔加大監所以符公議既為逍遙公又
作鳴夷子安車懸不出駟馬閒無事微雨漢陂舟殘日
終南騎富貴盡凌雲何人能至此猜禍皆及身何復至
如是賢哉此丈夫百世一人矣

秋夜有懷

夢裏憂身泣覺來衣尚濕骨肉煎我身不是謀生急如
何欲佐主功名未成立處世既孤特傳家無承襲明朝
走梁楚步步出門澀如何一寸心千愁萬愁入

喜鵲

棄羶在庭際雙鵲來搖尾欲啄怕人驚喜語晴光裏何
況佞倖人微禽解如此

蚊子

隱隱聚若雷嗜膚不知足皇天若不平微物教食肉貧

士無絳紗忍苦卧茅屋何事覓膏腴腹無太倉粟

鹿門夏日

滿院松桂陰日午却不知山人睡一覺庭鵲立未移出
檐趁雲去忘戴白接離書眼若薄霧酒腸如漏卮身外
所勞者飲食須自持何如便絕粒直使身無為

偶書

女媧掉繩索絙泥成下人至今頑愚者生如土偶身雲
物養吾道天爵高我貧大笑猗氏輩為富皆不仁

讀書

家資是何物積帙列梁牀高齋曉開卷獨共聖人語英
賢雖異世自古心相許案頭見蠹魚猶勝凡儔侶

貧居秋日

亭午頭未冠端坐獨愁予貧家烟爨稀竈底陰蟲語門
小媿車馬廩空慙雀鼠盡室未寒衣機聲羨鄰女

御定全唐詩卷六百八

欽定四庫全書

御定全唐詩卷六百九

皮日休

魯望讀襄陽耆舊傳見贈五百言過褒庸材靡
有稱是然襄陽曩事歷歷在目夫耆舊傳所未
載者漢陽王則宗杜元勳孟浩然則文章大匠
予次而贊之因而寄荅亦詩人無言不誦之義
也次韻

漢水碧於天南荆廓然秀廬羅遵古俗鄢郢迷昔園幽
奇無得狀巉絕不能究興替忽矣新山川悄然舊斑斑
生造士一一應玄宿巴庸乃嶮岨屈景實豪右是非既
自分涇渭不相就粵自靈均來清才若天漱偉哉洞上
隱卓爾隆中耨始將麋鹿狎遂與麒麟鬪萬乘不可謁
千鍾固非茂爰從景升死境上多兵候一作檀溪試戈
船峴嶺屯貝冑寂莫數百年質唯包礫琇上玄賞唐德
生賢命之授是為漢陽王帝曰俞爾奉臣德聳神鬼宏

才轢前後勢端唯金莖質古乃玉豆行葉蔭大椿詞源
吐洪溜六成清廟音一柱明堂構在昔房陵遷圓宮正
中漏緊王揭然出上下拓宇宙俯視三事者駸駸若童
幼低催護中興若鳳視其轂遇險必伸足逢誅將引脰
既正北極尊遂治衆星謬重聞章陵幸再見岐陽狩日
似新刮膜天如重慰綢易政疾似效求賢甚於購化之
未期年民安而國富翼衛兩舜趨鉤陳十堯驟忽然遺
相印如羿卸

一作御

其轂姦倖却乘鸞播遷遂終壽遺廟

屹峰嶸功名紛組繡開元文物盛孟子生荆岫斯文縱
奇巧秦璽新雕鏤甘窮卧牛衣受辱對狗竇思變如易
爻才通似元首祕於龍宮室怪於一作即天篆籀知者競

欲戴嫉者或將詬任達且百觚遂為當時陋既作才鬼
終恐為仙籍售予生二賢未得作升木狝蕪濟與獨善

俱敢懷其臭江漢稱炳靈克明嗣清晝繼彼欲為三如

醕如一作和醇酎既見陸天子鴛心却伏殿結彼世外交

遇之於邂逅兩鶴思競閒雙松格爭瘦唯恐別仙才連

連涕襟袖

魯望昨以五百言見貽過有褒美內揣庸陋彌增媿悚因成一十言上述吾唐文物之盛次叙相得之歡亦迭和之微旨也

三辰至精氣生自蒼頡前粵從有文字精氣銖於縣所以楊墨後文詞縱橫顛元狩富材術建安儼英賢厥祀四百餘作者如排穿五馬渡江日羣魚食蒲年大風蕩天地萬陣黃鬚羶縱有命世才不如一空拳後至陳隋

世得之拘且縲太浮如激灑太細如蚺蛇太亂如靡靡
太輕如芊芊流之為酌營變之為游畋百足雖云衆不
救殺馬蛇君臣作降虜北走如獬豸所以文字妖致其
國朝遷吾唐革其弊取士將科縣文星下為人洪秀密
於縲大開紫宸扉來者皆詳延日宴朝不罷龍姿歡轉
轉

音田呂氏春秋
云天子轉轉

於焉周道反由是秦法峻射洪陳子

昂其聲亦喧闐惜哉不得時將奮猶拘攣玉壘李太白
銅隄孟浩然李寬包堪輿孟澹擬

一作
擬

漪連埋骨采石

壙留神鹿門。挺俾其羈旅。死實覺天地。孱倚與子美。思
不盡如轉輪。縱為三十車。一字不可捐。既作風雅主。遂
司歌詠權。誰知耒陽土。埋却真神仙。當於李杜際。名輩
或泝沿。良御非異馬。由弓非他弦。其物無同異。其人有
嬖妍。自開元至今。宗匠紛如烟。爽若沆瀣英。高如崑崙
巔。百家囂浮說。諸子率寓篇。築之為京觀。解之為牲牷。
各持天地維。率意東西牽。競抵元化首。爭扼真宰咽。或
作制誥數。或為宮體淵。或堪被金石。或可投花鈿。或為

興隸唱或被兒童憐烏壘虜亦寫雞林夷爭傳披揭一作

倡覆載樞捩闔神異鍵力掀尾閭立思一作軋大塊旋

鬼

降氣或若虹耀影或如幾萬象瘡復瘡百靈瘠且癯謂

乎數十公筆若明堂椽其中有擬者不絕當如縱齊驅

不讓策竝駕或爭駢所以吾唐風直將三代甄被此文

物盛由乎聲詩宣采彼風人謠輜軒輕似鷗麗者固不

捨鄙者亦為銓其中有鑒戒一一堪雕鐫乙夜以觀之

吾君無釋焉遂命大司樂度之如星躔播於樂府中俾

為萬代蠲吹彼圓丘竹誦茲清廟弦不惟娛列祖兼可
格上玄粵予何為者生自江海孺駸駸自總角不甘耕
一壥諸昆指倉庫謂我死道邊何為不力農稽古真可
嗚遂與襍褻著蕝之臺笠全風吹蔓草花颯颯盈荒田
老牛瞪不行力弱誰能鞭乃將耒與耜並換槩與鉛閱
彼圖籍肆致之千百編攜將入蘇嶺
鹿門別名不就無出緣
堆書塞低屋添研涸小泉對燈任髻燕憑案從肘研苟
無切玉刀難除指上胼爾來五寒暑試藝稱精專昌黎

道未著文教如欲騫其中有聲病於我如誕譚

音天譚語不正

貌

是敢驅頽波歸之於大川其文如可用不敢佞與便

明水在豪枯太羹臨豆籩將來示時人猘猢垂饒涎亦
或尚華縟亦曾為便嫗亦能制灝灝亦解攻翩翩唯思
逢陣敵與彼爭後先避兵入句吳窮悴祇自跼平原陸
夫子投刺來翩跹開卷讀數行為之加敬虔忽窮一兩
首反顧唯曲拳始來遺巾幘乃敢排戈鋌或為拔幟走
或遭劇壘還不能收亂轍豈暇重為尊雖然未三北亦

可輸千鐲

丑專切尚書云贖罪千鐲

向來說文字爾汝名可聯聖人

病歿世不患窮而蹟我未九品位君無一囊錢相逢得
何事兩籠酬唱牋無顏解媿合底事居冗員方知萬鍾
祿不博五湖船夷險但明月死生應白蓮吟餘凭几飲
釣罷僂衰眠終拋峴山業相共此留連

吳中苦雨因書一百韻寄魯望

全吳臨巨溟百里到滄瀆海物競駢羅水怪爭滲漉狂
蜃吐其氣千尋勃然蹙一刷半天墨架為欹危屋怒鯨

盍相向吹浪山穀穀倏忽腥香冥須臾圻崖谷帝命有
嚴程慈物敢潛伏噓之為玄雲彌亙千萬幅直拔倚天
劍又建橫海纛化之為暴雨深潒射平陸如將月窟寫
似把天河撲著樹勝戟支中人過箭鏃龍光倏閃照蚪
角搗瑄觸此時一千里平下天台瀑雷公恣其志礮礮
裂電目蹋破霹靂車折却三四輻雨工避罪者必在蚊
睫宿狂發鏗訇音不得懈怠倖頃刻勢稍止尚自傾藪
藪不敢履洿處恐蹋爛地軸自爾凡十日茫然晦林麓

只是遇滂沱少曾逢霰霰伊余之解宇古製拙卜築顏
檐倒茵黃破砌頑莎綠只有方丈居其中踏且跼朽處
或似醉漏時又如沃階前平汎濫牆下起趑趄唯堪著

臺笠復可乘船宿

一作
鰲

雞犬並淋漓兒童但呶呶勃勃

生濕氣人人牢於鈎鬚眉漬將斷肝膈蒸欲熟當庭死

蘭芷四垣盛資菴解帙展斷書拂牀安壞櫝

一作
牖

跳梁

老蛙黽直向牀前浴蹲前但相聒似把白丁辱空厨方

欲炊漬米未離奠薪蒸濕不著白晝須然燭汙菜既已

寧買魚不獲鰕竟未成麥饘安能得梁肉更有陸先生
荒林抱窮蹙壞宅四五舍病篠三兩束蓋檐低礙首薜
地滑達足注欲透承塵濕難庇厨簾低摧在圭竇索漠
拋偏聚手指既已胼肌膚亦將癢一苞一作庖勢欲侈將

撐乏寸木盡日欠束薪經時無斗粟蛭蚰將入甑螻蛄

已臨窺

音復說文云如金而口大

嬌兒未十歲枵然自啼哭一錢買

粗粃數里走病僕破碎舊鶴籠狼藉晚蠹蔕千卷素書
外此外無餘蓄著處紵衣裂戴次紗帽醜惡陰潛過午

未及烹葵菽吳中銅臭戶七萬沸如臙膏止甘蟹鮓侈
唯僭車服皆希尉吏旨盡怕里胥錄低眉事庸奴開顏
納金玉唯到陸先生不能分一斛先生之志氣薄漢如
鴻鵠遇善必擎蹠見才輒馳逐庶不受一芥其餘安可
黷如何鄉里輩見之乃蜩縮粵予苦心者師仰但跼蹐
受易既可注請玄又堪卜百家皆搜蕩六藝盡翻覆似
餒見太牢如迷遇華燭半年得酬唱一日屢往復三秀
間稂莠九成雜巴濮奔命既不暇乞降但相續吟詩口

吻嗚把筆指節瘵君才既不窮吾道由是篤所益諒弘
多厥交過親族相逢似丹漆相望如眇眇論業敢並驅
量分合繼躅相違始兩日忡忡想華縟出門泥漫漶恨
無直轅輦十錢賃一輪逢一作上鳴斛觶赤脚枕書帙

訪予穿詰曲入門且抵掌大噓時碌碌茲一作淋既浹

旬無乃害九穀予惟餓不死得非道之福手中捉詩卷
語快還共讀解帶似歸來脫巾若沐浴疎如松間篁野
甚康對鹿行譚弄書籤臥話枕碁局呼童具盤餐撒衣

換雞鶩或蒸一升麻或煤兩把菊用以閱幽竒豈能資
口腹十分煎臯盧半榼挽醅醕高談緊無盡晝漏何太
促我公大司諫一切從民欲梅潤侵東杖和氣生空獄
而民當斯時不覺有煩溽念滂為之災拜神再三告太
陰霍然收天地一澄肅燔炙既芬芬威儀乃翼翼須權
元化柄用拯中夏酷我願薦先生左右輔司牧茲雨何
足云唯思舉顏歎

初夏即事寄魯望

夏景恬且曠遠人疾初平黃鳥語方熟紫桐陰正清
解宇有幽處私游無定程歸來閉雙關亦忘枯與榮
土室作深谷蘚垣為干城啟杉突施架迸筍支檐楹
片石共坐穩病鶴同喜晴癭木四五器筇杖一兩莖
泉為菖天味松作羲皇聲或看名畫徹或吟閒詩成
忽枕素琴睡時把仙書行自然寡儔侶莫說更紛爭
具區包地髓澤含天英粵從三讓來俊造紛然生
顧予客茲地薄我皆為僇唯有陸夫子盡力提客卿
各負出俗才俱懷超

世情駐我一棧車吸君數藜羹敲門若我訪倒屣

一作屣

欣逢迎胡餅蒸甚熟貊盤舉尤輕茗脆不禁炙酒肥或
難傾埽除就藤下移榻尋虛明唯共陸夫子醉與天壤
并

二遊詩

并序

吳之士有恩王府參軍徐修矩者守世書萬卷優
游自適余假其書數千卷未一年悉償夙志酣飫
經史或日宴忘飲食次有前涇縣尉任晦者其居

有深林曲沼危亭幽砌余並次以見之或退公之暇必造以息焉林泉隱事恣用研詠大凡游於二君宅無浹旬之間因作詩以留贈名一作目之曰二遊兼寄陸魯望

徐詩

東莞為著姓奕代皆雋喆強學取科第名聲盡孤揭自為方州來清操稱凜冽唯馮墳籍多必云清俸絕宣毫利若風剡紙光於月札吏指欲胼萬通排未闋樓船若

夏屋欲載如垤塼轉徙入吳都縱橫礙門闌縹囊輕似
霧細帙殷於血以此為基構將斯用貽厥重於通侯印
貴却全師節我愛參卿道承家能介潔潮田五萬步草
屋十餘一作數案微宦不能去歸來坐如刳保茲萬卷書

守慎如羈紲念我曾苦心相逢無間別引之看祕寶任
得窮披閱軸間翠鈿剥籤古紅牙折帙解帶芸香卷開
和桂屑枕蕪石峰刃榻共松瘡癖一臥寂無諠數編看
盡徹或攜歸解宇或把穿林樾挈過太湖風抱宿支硎

雪如斯未星紀悉得分毫末翦除幽僻數滌蕩玄微窟

學海正狂波予頭向中顛

烏沒切

聖人患不學垂誠尤為

切苟昧古與今何殊瘖共矚

五骨切

昔之慕經史有以備

筆札何況遇斯文借之不曾輟吾衣任穀纊吾食甘糠
覈其道苟可光斯文那自伐何竹青堪殺何蒲重好截
如能盈兼兩便足酬飢渴有此競苟榮聞之無可噉東
臯耨烟雨南嶺提薇蕨何以謝徐君公車不聞設

任詩

任君恣高放斯道能寡合一宅閒林泉終身遠囂雜嘗

聞佐浩穰散性多儻

五孟切

偕

音皆不任事貌

歟爾解其綬遺之

如棄鞵歸來鄉黨內却與親朋洽開溪未讓丁列第方

稱甲入門約百步古木聲雲霞廣檻小山欹斜廊怪石

夾白蓮倚蘭楯翠鳥緣簾押地勢似五瀉巖形若三峽

猿眠但膺肭鳧食時啞啞撥荇下文竿結藤縈挂攢門

留醫樹客壁倚栽花鋤度歲止褐衣經旬唯白帽多君

方閉戶顧我能倒屣請題在茅棟留坐於石榻魂從清

景暹衣任烟霞裒階墀龜任上枕席鷗方狎沼以頗黎
鏡當中見魚眨杯杓悉杉瘤盤筵盡荷葉閒斟不置罰
閒奕無爭劫閑日不整冠閒風無用筴以斯為思慮吾
道寧疲繭袞衣競璀璨鼓吹爭鞞鞞欲者解擠排詬者
能詬譎權豪暫翻覆刑禍相填壓此時一圭竇不肖饒
閭闔有第可棲息有書可漁獵吾欲與任君終身以斯
恆

追和虎丘寺清遠道士詩

并序

聖人為春秋凡諸侯有告則書無告則不書蓋所以懲其偽而敦其實也夫怪之與神雖曰不言在傳則書之者亦撫其實而為之也若然者神之與

怪果安

一本作
果有

邪噫聖賢有不得其志者則必垂

之於言也大則為經誥小則為歌詠蓋不信於當時則取愬於後世抑鬼神有生不得其志者死亦然邪若憑而宣之則石言乎晉物叫于宋是也若夢而辯之則良夫有昆吾之歌聲伯有瓊瑰之謠

是也自茲已後人倫不修神藻益熾在君人者悟之則為瑞逆之則為妖其冥諷昧刺時出於世者則與騷人狎客往往敵於忽微焉虎丘山有清遠道士詩一首其所稱自殷周而歷秦漢迄於近代抑二千年末以鬼神自謂亦神怪之甚者格之以清健飾之以俊麗一句一字若奮若搏彼建安詞人儻在不得居其右矣顏太師魯公愛之不暇遂刻於巖際并有繼作李太尉衛公欽清遠之高致

慕魯公之素尚又次而和之顏之叙事也典李之
屬思也麗並一時之寡和又幽獨君詩二首亦甚
奇愜予嗜古者觀而樂之因繼而為和荅幽獨君
一篇不知孰氏之作其詞古而悲亦存於篇末太
玄曰大無方易無時然後為鬼神也噫清遠道士
果鬼神乎抑道家者流乎抑隱君子乎詞則已矣
人則吾不知也

成道自衰周避世窮炎漢荆杞雖云梗烟霞尚容竄茲

岑信靈異吾懷慙流玩石澀古鐵鉉嵐重輕埃漫松膏
膩幽徑蘋末著孤岸諸蘿幄幕暗衆鳥陶匏亂巖罅地
中心海光天一半玄猿行列歸白雲次第散蟾蜍生夕
景沆瀣餘清旦風日采幽什墨客學靈翰嗟予慕斯文
一詠復三歎顯晦雖不同茲吟粗堪贊

追和幽獨君詩次韻

念爾風雅魄幽咽猶能文空令傷魂鳥啼破山邊墳
恨劇但埋土聲幽難放哀墳古春自晚愁緒空崔嵬白

楊老無花枯根侵夜臺天高有時裂川去何時迴雙眼
不能濡六藏無可摧不聞塞蓬事何必深悲哉

奉和魯望讀陰符經見寄

三百八十言出自伊祈氏上以生神仙次云立仁義玄
機一以發五賊紛然起結為日月精融作天地髓不測
似陰陽難名若神鬼得之升高天失之沈厚地具茨雲
木老大塊烟霞委自顓頊以降賊為聖人軌堯乃一庶
人得之賊帝摯摯見其德尊脫身授其位舜唯一鰥民

冗冗作什器得之賊帝堯白丁作天子禹本刑人後以
功繼其嗣得之賊帝舜用以平泮水自禹及文武天機
惓然弛姬公樹其綱賊之為聖智聲詩川競大禮樂山
爭峙爰從幽厲餘宸極若孩穉九伯真犬彘諸侯寶虎
兕五星合其耀白日下闕里由是聖人生一作生於焉
當亂紀黃帝之五賊拾之若青紫高揮春秋筆不可刊
一字賊子虐其斯姦臣痛於箠至今千餘年蚩蚩受其
賜時代更復改刑政崩且陷予將賊其道所動多訾毀

叔孫與臧倉賢聖多如此如何黃帝機吾得多坎躋縱
失生前祿亦多身後利我欲賊其名垂之千萬祀

初夏遊楞伽精舍

越舫輕似萍漾漾出烟郭人聲漸踈曠天氣忽寥廓伊
予愜斯志有似副癰瘻遇勝即夷猶逢幽且淹泊俄然
擢深處虛無倚巖嶠霜毫一道人引我登龍閣當中見
壽象欲禮光紛箔珠幡時相鏗恐是諸天樂樹杪見觚
稜林端逢楮垆千尋井猶在萬祀靈不涸下通蛟人道

水色黥而惡欲照六藏驚將窺百骸愕竭去山南嶺其
險如邛笮悠然放吾興欲把青天摸紫藤垂罽珥紅荔
懸纓絡蘚厚滑似釐峰尖利如鋸斯湏到絕頂似愈漸

離燿

一作
曜

一片太湖光只驚天漢落梅風脫綸帽乳水

透芒屨嵐姿與波彩不動渾相著既不暇供應將何以
酬酢却來穿竹徑似入青油幕穴恐水君開龕如鬼工
鑿窮幽入茲院前楯臨巨壑遺畫龍奴穉殘香蟲篆薄
褫魂窺玉鏡澄慮聞金鐸雲態共縈留鳥言相許諾古

木勢如虺近之恐相螫怒泉聲似激聞之意爭博時禽
俟已嘿衆籟蕭然作遂令不羈性戀此如纏縛念彼上
人者將生付寂寞曾無膚撓事官把心源度胡為儒家
流沒齒勤且恪沐猴本不冠未是謀生錯言行既異調
棲遲亦同託願力儻不遺請作華林鶴

公齋四詠

小松

婆娑只三尺移來白雲徑亭亭向空意已解凌遼夏葉

健似蚪鬚枝脆如鶴脰清音猶未成紺彩空不定陰圓
小芝蓋鱗澀脩荷柄先愁被鷄搶預恐遭蝸病結根幸
得地且免離離映礫礫不難遇在保晚成性一日造明
堂為君當畢命

小桂

一子落天上生此青壁枝歛從山之幽斲斷雲根移勁
挺隱珪質盤珊緹油姿葉彩碧髓融花狀白毫蕤稜層
立翠節偃蹇膠青螭影澹雪霽後香汎風和時吾祖在

月竈孤貞能見怡願老君子地不敢辭喧卑

新竹

笠澤多異竹移之植後楹一架三百本綠沈森冥冥圓
緊珊瑚節鈔利翡翠翎儼若青帝仗蠱如紫姑屏撼撼
微風度漠漠輕靄生如神語釣天似樂奏洞庭一玩九
藏冷再聞百骸醒有根可以執有復

音福竹譜
云竹實也

可以馨

願稟君子操不敢先凋零

鶴屏

三幅吹空縠孰寫仙禽狀髀耳側以

一作聽相鶴經云
駐頰髀耳

則聽
響遠

赤精曠如望

露眼赤精
則眇遠

引吭看雲勢翹足臨池樣

頗似近蓐席還如入方丈盡日空不明窮年但相向未
許子晉乘難教道林放貌既合羽儀骨亦符法相願升
君子堂不必思崑閭

奉酬崔璐進士見寄次韻

伊余幼且賤所稟自以殊弱歲謬知道有心匡皇符意
超海上鷹運跼轅下駒縱性作古文所為皆自如但恐

才格劣敢誇詞彩數句句考事實篇篇窮玄虛誰能變
羊質競不獲驪珠粵有造化手曾開天地鑪文章鄴下
秀氣貌淹中儒展我此志業期君持中樞蒼生眼穿望
勿作礪溪謨

御定全唐詩卷六百九

欽定四庫全書

御定全唐詩卷六百十

皮日休

太湖詩

并序

余頃在江漢嘗耨鹿門獻洞湖然而未能放形者
抑志於道也爾後以文事造請於是南浮至二別
涉洞庭迴觀敷淺源登廬阜濟九江由天柱抵霍
嶽又自箕潁轉樊鄧陟商顏入藍關凡自江漢至

於京干者十數候繞者二萬里道之不行者有困
辱危殆志之可適者有山水遊玩則休戚不孤矣
咸通九年自京東遊復得宿太華樂荆山賞女兒
度輶轅窮嵩高入京索浮汴渠至揚州又航天塹
從北固至姑蘇噫江山幽絕見貴於地誌者余之
所到不翅於半則烟霞魚鳥林壑雲月可為屬厭
之具矣尚枵然於志者抑古聖人所謂獨行之性
乎逸民之流乎余真得而為也爾後聞震澤包山

其中有靈異學黃老徒樂之多不返益欲一觀豁
平生之鬱鬱焉十一年夏六月會大司諫清河公
憂霖雨之為患乃擇日休將公命禱於震澤祀事
既畢神應如響於是太湖之中所謂洞庭山者得
以恣討凡所歷皆圖籍稱為靈異者遂為詩二十
章以志其事兼寄天隨子

初入太湖

自胥口入去
州五十里

聞有太湖名十年未曾識今朝得遊汎大笑稱平昔一

舍行昏塘盡日到震澤三萬六千頃千頃頗黎色連空
澹無類照野平絕隙好放青翰舟堪弄白玉笛疎岑七
十二雙雙露矛戟悠然嘯傲去天上搖畫艦西風乍獵
獵驚波菴涵碧倏忽雷陣吼須臾玉崖一作岸坼樹動為
蜃尾山浮似鼇脊落照射鴻浴清輝蕩拋擲一作擲雲輕
似可染霞爛如堪摘漸暝無處泊挽帆從所適枕下聞
澎湃一作八肌上生瘡痂討異足遭迴尋幽多阻隔願風
與良便吹入神仙宅甘將一蘊書永事嵩山伯

曉次神景宮

夜半幽夢中扁舟似鳬躍曉來到何許俄倚包山脚三百六十丈攢空利如削遐瞻但徙倚欲上先矍鑠濃露濕莎裳淺泉漸草屨行行未一里節境轉寂寞靜徑侵沈寥仙扉傍巖崿松聲正清絕海日方照灼歛臨幽虛天萬想皆擺落壇靈有芝菌殿聖無鳥雀瓊幃自迴旋錦旌空粲錯鼎氣為龍虎香烟混丹腹凝看出次雲默聽語時鶴綠書不可注雲笈應無鑰晴來鳥思喜崦裏

花光弱天籟如擊琴泉聲似撻鐸清齋洞前院敢負玄
科約空中悉羽章地上皆靈藥金醴可酣暢玉豉堪咀
嚼存心服燕胎叩齒讀龍蹠福地七十二茲焉永堪一作

堪託在獸乏虎羆於蟲不毒蠱嘗聞擇骨錄仙誌非可

作綠腸既朱髓青肝復紫絡伊余乏此相天與形貌惡

每嗟原憲瘡常苦齊侯瘡終然合委頓剛亦慕寥廓三

茅亦常

一作
嘗

住竟與珪組薄欲問包山神來賒少巖壑

入林屋洞

齋心已三日筋骨如烟輕腰下佩金獸手中持火鈴幽
塘四百里中有日月精連互三十六各各為玉京自非
心至誠必被神物烹顧余慕大道不能惜微生遂招放
曠侶同作幽憂行其門纔函丈初若盤薄硯洞氣黑映
眈苔髮紅髻鬢試足值坎窞低頭避崢嶸攀緣不知倦
怪異焉敢驚匍匐一百步稍稍策可橫忽然白蝙蝠來
撲松炬明人語散瀕洞石響高玲玕脚底龍蛇氣頭上
波濤聲有時若服匿偈仄如見繡俄爾造平澹豁然逢

光晶金堂似鑄出玉座如琢成前有方丈沼凝碧融人
情雲樣湛不動琉璃涵而馨漱之恐減斟酌之必延齡
愁為三官責不敢攜一甌昔云夏后氏於此藏真經刻
之以紫琳秘之以丹瓊期之以萬祀守之以百靈焉得
彼丈人竊之不加刑石匱一以出左神俄不扁禹書既
云得吳國由是傾薛縫纔半尺中有怪物腥欲去既嘆
惜將迴又伶俜却遵舊時道半日出杳冥屨泥去聲惹石
髓衣濕霑雲英玄錄乏仙骨青文無絳名雖然入陰宮

不得朝上清對彼神仙窟自厭濁俗形却憎造物者遣
我騎文星

雨中遊包山精舍

松門互五里彩碧高下絢幽人共躋攀勝事頗清便
翠林上雨隱隱湖中電薜帶輕束腰荷笠低遮面濕履
黏烟霧一作露穿衣落霜霰笑次度巖壑困中遇臺殿老

僧三四人梵宇十數卷施稀無夏屋境僻乏朝膳散髮
抵泉流支頤數雲片坐石忽忘起捫蘿不知倦異蝶時

似錦幽禽或如鈿葉夢還夏刃楫欄自搖扇俗態既斗
藪野情空眷戀道人摘芝菌為予備午饌渴興一作與石
榴羹飢愜胡麻飯如何事于役茲遊急於傳却將塵土
衣一任瀑絲濺

遊毛公壇

却上南山路松行儼如廡松根礙幽徑孱顏不能斧擺
履跨亂雲側中蹲怪樹三休且半日始到毛公塢兩水
合一澗深崖却為浦相敵百千戟共搥十萬鼓噴散日

月精射破神仙府，唯愁絕地脈，又恐折天柱。一窺耳目，
眩再聽雲髮，豎次到鍊丹井。井幹翳宿莽，下有藥剛丹。
勺之百疾愈，凝於白獺髓。湛似桐馬乳，黃露醒齒牙。碧
粘甘肺腑，檜異松復怪。枯疎互撐拄，乾蛟一百尺。翬然
半天舞，下有毛公壇。壇方不盈畝，當時雲龍篆一片苔。
蘇古

有劉先生鎮壇
符今存於堂

時時仙禽來，忽忽祥煙聚。我愛周

息元，忽起應明主。

周微君名
曰息元

三諫却歸來，迴頭唾圭組。

伊余何不幸，斯人不復覩。如何大開口，與世爭枯腐。將

山待夸娥以肉投猱獠歟坐侵桂陰不知已與午茲地
足靈境他年終結宇敢道萬石君輕於一絲縷

三宿神景宮

古觀岑且寂幽人情自怡一來包山下三宿湖之湄況
此深夏夕不逢清月姿玉泉浣衣後金殿添香時客省
高且敞客牀蟠復奇石枕冷入腦荀席寒侵肌氣清寐
不著起坐臨階墀松陰忽微照獨見螢火芝素鶴警微
露白蓮明暗池窗櫺帶乳蘚僻縫含雲鞋聞磬走題題

見燭奔羈雌沉灘欲滴瀝芭蕉未離披五更山蟬響醒
發如吹簾杉風忽然起飄破步虛詞道客巾屨樣上清
朝禮儀明發作此事豈復甘趨馳

以毛公泉一餅獻上諫議因寄

劉根昔成道茲塢四百年氤氲被其體號為綠毛仙因
思清冷汲鑿彼崖一作崔嶺巔五色既鍊矣一勺方鏗然

既用文武火俄窮雌雄篇赤鹽撲紅霧白華飛素煙服
之生羽翼爾沖玄天真隱尚有迹厥祀將近千我來

討靈勝到此期終焉滴苦破竇淨蘚深餘甃圓澄如玉
髓潔汎若金精鮮顏色半帶乳氣味全和鉛飲之融痞
蹇濯之伸拘攣有時玩者觸倏忽風雷顛素綆絲不短
越巽腹甚便汲時月液動擔處玉漿旋敢獻大司諫置
之鈴閣前清如介潔性滌比埽蕩權炙背野人興亦思
侯伯憐也知飲冰苦願受一餅泉

縹緲峰

頭戴華陽帽手拄大夏筇清晨陪道侶來上縹緲峰帶

露巖藥蔓和雲尋鹿踪時驚鼯鼠飛上千丈松翠壁

內有室叩之虛磬

戶冬切

磬

隆音

古穴下徹海視之寒鴻濛

遇歇有佳思緣危無倦容須臾到絕頂似鳥穿樊籠恐
足蹈海日疑身凌天風衆岫點巨浸四方接圓穹似將
青螺髻撒在明月中片白作越分孤嵐為吳宮一陣靉
靆氣隱隱生湖東激雷與波起狂電將日紅磬磬雨點
大金鵲轟下空暴光隔雲閃髮髻互天龍連拳百丈尾
下拔湖之洪梓為一雪山欲與昭回通移時却攬下細

碎衡與嵩神物諒不測絕景尤難窮杖策下返照漸聞
仙觀鐘烟波噴肌骨雲壑闌心胃竟死愛未足當生且
歡逢不然把天爵自拜太湖公

桃花塢

黃緣度南嶺盡日穿林樾窮深到茲塢逆興轉超忽塢
名雖然在不見桃花發恐是武陵溪自閉仙日月倚峰
小精舍當嶺殘耕塋將洞任迴環把雲恣披拂閒禽啼
叫窰險狖眠碑砢微風吹重嵐碧埃輕勃勃清陰減鶴

睡秀色治人渴敲竹鬪錦縱弄泉爭咽嗚空齋蒸柏葉
野飯調石髮空羨塢中人終身無履屐

明月灣

曉景澹無際孤舟忘迴環試問最幽處號為明月灣半
巖翡翠巢望見不可攀柳弱下絲網藤深垂花鬢松癭
忽似狄石文或如戲釣壇兩三處苔老腥斑斑沙雨幾
處霽水禽相向閒野人波濤上白屋幽深間曉培橘栽
去暮作魚梁還清泉出石砌好樹臨柴關對此老且死

不知憂與患好境無處住好處無境刪
赧然不自適脈脈當湖山

練瀆

吳王所開

吳王厭得國所玩終不足一上姑蘇臺猶自嫌局促
艤六宮閑艤衝後軍肅一陣水麝風空中蕩平淥鳥
因避錦帆龍跼防鐵軸流蘇惹煙浪羽葆飄巖谷靈
境太蹂踐因茲塞林屋空闊嫌太湖崎嶇開練瀆三
尋巖石齒數里穿山腹底靜似金膏礫碎如丹粟波
殿鄭旦醉

蟾閣西施宿幾轉含烟舟一唱來雲曲不知闌楯上夜
有越人鏃君王掩面死嬪御不敢哭豔魄逐波濤荒宮
養麋鹿國破溝亦淺代變草空綠白鳥都不知朝眠還
暮浴

投龍潭

在龜山

龜山下最深惡氣何洋溢涎水瀑龍巢腥風卷蛟室曉
來林岑靜寧色如怒日氣涌撲炙煤波澄埽純漆下有
水君府貝闕光比櫛左右列介臣縱橫守鱗辛月中珠

母見煙際楓人出生犀不敢燒水怪恐摧捽時有慕道
者作彼投龍術端嚴持碧簡齋戒揮紫筆兼以金蜿蜒
投之光煖律琴高坐赤鯉何許縱仙逸我願與之遊茲
焉託靈質

孤園寺

梁散騎常
侍吳猛宅

艇子小且兀緣湖蕩白芷紫紆泊一碕宛到孤園寺蘿
島凝清陰松門湛虛翠寒泉飛碧螭古木鬬蒼兕鐘梵
在水魄樓臺入雲肆巖邊足鳴蟻樹杪多飛鷗香莎滿

院落風汎金霍靡靜鶴啄柏蠹閒猱弄楸螭小殿熏陸
香古經貝多紙老僧方瞑坐見客還強起指茲正險絕
何以來到此先言洞壑數次話真如理磬韻醒悶心茶
香凝皓齒中之劫貝布饌以梅檀餌數客得清淨終身
欲依止可憐陶侍讀身列丹臺位雅號曰勝力亦聞師
佛氏陶隱居嘗夢見神像謂已曰爾當七地大王號曰勝力也今日到孤園何妨稱
弟子

上真觀

徑盤在山肋繚繞窮雲端摘茵杖頭紫綠崖屐齒剗半
日到上真洞宮知造難雙戶啓真景齋心方可觀天鈞
鳴響亮天祿行蹢躅琪樹夾一徑萬條青琅玕兩松峙
庭際怪獸吁可歎大螭騰共結脩蛇飛相盤皮膚坼甲
冑枝節擒獮狂罅處似天裂朽中如井眚襪裊風聲疣
跂跂地力疼音難根上露鉗鈇空中狂波瀾合時若莽蒼
闢處如輾轅儼對無霸陣靜問嚴陵灘靈飛一以護山
都焉敢干兩廊潔寂歷中殿高巘屹靜架九色節閒懸

十絕幡微風時一吹百寶清闌珊昔有葉道士位當升
靈官欲箋紫微志唯食虹影丹既逐隱龍去道風由此
殘猶聞絳目草徃徃生空壇羽客兩三人石上譚泥丸
謂我或龍胄粲然與之歡衣巾紫華冷食次白芝寒自
覺有真氣恐隨風力搏明朝若更佳必擬隳儒冠

銷夏灣

太湖有曲處其門為兩崖當中數十頃別如一天池號
為銷夏灣此名無所私赤日莫斜照清風多遙吹沙嶼

埽粉墨松竹調塤麓山果紅韎鞞水苔青髻髻木陰厚
若瓦巖磴滑如飴我來此遊息夏景方赫曦一坐盤石
上肅肅寒生肌小艇方言云小舸謂之艇或可汎短策或可支行
驚翠羽起坐見白蓮披歛袖弄輕浪解巾敞涼颺但有
水雲見更餘沙禽知京洛往來客暍死緣奔馳此中便
可老焉用名利為

包山祠

白雲最深處像設盈巖堂村祭足茗糲水奠多桃漿簪

蓮突古砌薜荔繡頽牆爐灰寂不然風送杉桂香積雨
晦州里流波漂稻梁恭惟大司諫憫此如發狂命予傳
明禱祇事實不遑一奠若肸蠭再祝如激揚出廟未半
日隔雲逢澹光巘巘雨點少漸收羽林槍忽然山家犬
起吠白日傍公心與神志相向如玄黃我願作一疏奏
之於穹蒼留神千萬祀永福吳封疆

聖姑廟

在大姑山晉王彪二女相
次而歿有靈因而廟焉

洛神有靈逸古廟臨空渚暴雨駁丹青荒蘿繞梁招野

金野史卷之六
卷六
風旋芝蓋飢烏銜椒糝寂寂落楓花時時鬪鼯鼠常云
三五夕盡會妍神侶月下留紫姑霜中召青女俄然響
環珮倏爾鳴機杼樂至有聞時香來無定處目眩如有
待魂斷空無語雲雨竟不生留情在何處

太湖石

出龜
頭山

茲山有石岸抵浪如受屠雪陣千萬戰蘚巖高下剝乃
是天詭怪信非人功夫白丁一云取難甚網珊瑚厥狀
復若何鬼工不可圖或拳若虺蜴或蹲如虎羆連絡若

鉤鐔重疊如夢跼或若巨人豁或如太帝符降肝實當
筍格磔琅玕株斷處露海眼移來和沙鬚求之煩耄倪
戴之勞舳艫通侯一以盼貴却驪龍珠厚賜以賤賁遠
去窮京都五侯土山下要爾添品齧賞玩若稱意爵祿
行斯須苟有王佐士崛起於太湖試問欲西笑得如茲
石無

崦裏

傍龜山下有
良田二十頃

崦裏何幽奇膏腴二十頃風吹稻花香直過龜山頂青


苗細膩臥白羽悠溶靜塍畔起鷗鷺田中通舴艋幾家
傍潭洞孤戍當林嶺罷釣時煮菱停綠或焙茗峭然八
十翁生計於此永苦力供征賦怡顏過朝暝洞庭取異
事包山極幽景念爾飽得知亦是遺民幸

石板

在石公
山前

翠石數百步如板漂不流空疑水妃意浮出青玉洲中
若營龍劍外唯疊蛇矛狂波忽然死浩氣清且浮似將
翠黛色抹破太湖秋安得三五夕攜酒擢扁舟名取月

夫人嘯歌於上頭又恐霄景閣虛皇拜仙侯欲建九錫
碑當立十二樓瓊文忽然下石板誰能留此事少知者
唯應波上鷗



御定全唐詩卷六百十